

## SAOPŠTENJE ZA JAVNOST I MEDIJE

Broj: 02-49-1641/21  
29. 12. 2021. godine

### **Imenovan novi saziv Komisije za vrijednosne papire Federacije Bosne i Hercegovine; Održano jedanaest sjednica, riješeno skoro 300 predmeta; Komisija radi na jačanju odnosa s učesnicima na tržištu kapitala Federacije Bosne i Hercegovine**

Novi saziv Komisije za vrijednosne papire Federacije potvrđen je na 12. sjednici Doma naroda Parlamenta Federacije Bosne i Hercegovine održanoj 9.9.2021. godine. Tom prilikom izglasan je novi, treći po redu, saziv Komisije u sastavu: Adnan Zukić, predsjednik, dr. sc. Matej Živković, zamjenik predsjednika, te dr. sc. Esad Dželilović, Romeo Zelenika i Predrag Mladen, članovi Komisije. Prva, konstituirajuća sjednica održana je 7.10.2021. godine, a do kraja tekuće godine održano je ukupno 11 sjednica na kojima su razmatrane 443 tačke dnevnog reda, te riješeno skoro 300 predmeta koji su dostavljeni na postupanje u periodu tokom kojeg prošli saziv Komisije nije funkcionirao zbog nedostatka kvoruma. Na ovaj način je Komisija u svega tri mjeseca rada riješila polovicu zaostalih predmeta, sve u cilju olakšavanja učesnicima na tržištu kapitala da ostvaruju svoje interese i posluju bez zastoja. Od posebnog značaja za tržište kapitala je odobravanje odluka o povećanju kapitala. S tim u vezi, zahvaljujući postupanju Komisije uspješno je okončano povećanje kapitala kod šest osiguravajućih društava zbog čega nije u pitanje doveden kontinuitet njihovog poslovanja. Kapital je povećan i kod četiri banke koje posluju u Federaciji Bosne i Hercegovine, dok su dionička društva, upisana u Registar emitenata kod Komisije, emitovale vrijednosne papire čija vrijednost iznosi skoro 141 milion KM. Istovremeno s rješavanjem predmeta koji datiraju od prije imenovanja novog saziva, Komisija blagovremeno razmatra novopristigle zahtjeve učesnika na tržištu i drugih stranaka.

U okviru svojih ostalih aktivnosti, Komisija aktivno radi na jačanju odnosa s ostalim institucijama tržišta kapitala, a naročito s Registrom vrijednosnih papira u Federaciji Bosne i Hercegovine i Sarajevskom berzom/burzom vrijednosnih papira, kao i predstavnicima učesnika na tržištu vrijednosnih papira.

Program rada Komisije za vrijednosne papire Federacije Bosne i Hercegovine za 2022. godinu obuhvatit će mnogobrojne aktivnosti, kako bi ova institucija u okvirima svojih ovlaštenja u najvećoj mogućoj mjeri unaprijedila stanje na tržištu kapitala i uslove za investiranje.

Dotadne informacije o aktivnostima Komisije i tržištu vrijednosnih papira u FBiH dostupne su na našoj web stranici: [www.komvp.gov.ba](http://www.komvp.gov.ba), kao i putem telefona 033 267 671, 203 844, 203 902.

Predsjednik  
Komisije za vrijednosne papire  
Federacije Bosne i Hercegovine

Adnan Zukić